

# Okršaj Jovanovića i Dodika o genocidu u BiH

1 februar 2012 Izmijenjeno 18:48 CET

**Dodik negirao genocid i najavio raspad BiH, dok ga je Jovanović optužio za bahatost i dodjelu Karadžićevih ordenja**



Predsjednik bh. entiteta Republika Srpska Milorad Dodik izjavio je da nikada nije priznao da se dogodio genocid, te poručio da će se Bosna i Hercegovina „raspasti na sastavne dijelove jednog dana“, na što je u direktnom medijskom sučeljavanju lider Liberalno demokratske partije (LDP) Čedomir Jovanović uzvratio kako je nemoguće vjerovati da će se protokom vremena BiH raspasti, te da je počinjen genocid.

U organizaciji beogradske agencije Tanjug u srijedu je u Beogradu organizirana debata u kojoj su učestvovali Jovanović i Dodik o temi "Da li je RS genocidna tvorevina ili izraz volje naroda?" "Neću umanjivati težinu rečenice koju sam izrekao. Republika Srpska je nastala na genocidu. U Srebrenici se desio genocid i to je činjenica, ma šta vi sad pričali ovdje", kazao je Jovanović i dodao:

## Dodjela ordenja

"Za ovaj susret, u centrali Tanjuga, čuvaju nas specijalci i sve izgleda kao da Srbija i Hrvatska igraju rukometnu utakmicu. Od koga nas čuva policija? Od kojih to srpskih junaka čuvaju mene ili Dodika?"

Dodik je potom pozvao Jovanovića u RS. "Šta ja imam s vama obilaziti Republiku Srpsku. Tamo je narod nesrećan, nezaposlen, osuđen na političku bahatost i teatralnost", odgovorio je Jovanović.

Sa druge strane, Dodik je negirao genocid. „Tamo je bio sukob, tada su muslimani u nekim svojim formacijama izlazili po selima u Srebrenici i oko Srebrenice“, rekao je i dodao da je „refleks na to je bio takav, on je bio bespotreban, učinjen je ogroman ratni zločin.“ „Ali, prema međunarodnoj kvalifikaciji ne može se smatrati da je kolektivitet odgovoran i ne može se smatrati da je RS nastala na genocidu, kad se zna da se zločin desio '95. godine, a RS je formirana '92.“, rekao je Dodik.

"Ovo nije '92. godina gospodine Dodik i mi ne razgovaramo o onome što će biti. Bosna nije država, a objasniti ću vam i zašto. Kad god Srbija nije pokazivala sposobnost da razumije Bosnu, kad god je tražila korist za sebe, stradala je prvo Bosna, pa i sama Srbija. Mislim da je Srđan Aleksić iz Trebinja pijemont srpstva, to je Srbin kojeg poštuje svaki Hrvat i svaki Bošnjak, a ne Krajišnik, ne Karadžić i ne oni koji hodaju po Banjoj Luci sa svojim ostacima nacionalizma. To je suština našeg problema", rekao je Jovanović. Jovanović je podsjetio na Dodikovo dodjeljivanje ordenja koje su ranije dobili Radovan Karadžić i njegovi saradnici.

„BiH nije postojala sve do Dayton. Nije imala ni teritorij. Amerika je uključila BiH u potpisivanje Dayton, jer je međunarodno priznala prije toga, pa je htjela da sačuva svoj obraz“, rekao je Dodik te dodao: "Od Dayton je nastala BiH, a RS je postojala kao država prije toga, imala teritoriju i narod, RS je dobila samo legitimnost potpisivanjem Dayton". Također je rekao da on lično nikada nije priznao da se genocid u Srebrenici dogodio, već da je samo konstatirao činjenicu da je sud to utvrdio. "Samo sam konstatirao da je sud utvrdio da je izvršen genocid kod presude Krstiću, nisam priznao činjenicu da se on dogodio. Smatram da se genocid kao kvalifikacija ne može održati.. Smatram da se nije desio...", rekao je Dodik.

S druge strane, Jovanović je rekao da je Dodik promijenio svoj stav te da je 2008. godine izjavio da zna da se u Srebrenici desio genocid. Također je naveo da „su oni koji su vodili RS, napravili je na Srebrenici i opsadi Sarajeva“. „Napravili su je njen prvi predsjednik, prvi vojnik i predsjednica, koji su svi optuženi u Hagu“, rekao je Jovanović. U duelu je također istakao da se ne može istovremeno biti žrtva i dželat. On je upitao predsjednika RS da li i dalje misli da je Radovan Karadžić "zlotvor" kao što je ranije govorio, na šta je Dodik podsjetio da je Karadžić sada u Hagu, da odgovara za ono što je uradio i da će sud utvrditi je li kriv. "Karadžić je zaslužan za stvaranje RS-a, a kasnije je učinio određene stvari za šta mu se sudi u Hagu", rekao je Dodik. "Helsinški komitet je rekao da u Sarajevu živi 95 posto Bošnjaka", rekao je Dodik. „Zašto ne pitate Gorana Bregovića i Zdravka Čolića zašto se ne vraćaju u Sarajevo“, rekao je on na šta je Jovanović odgovorio da je iz Banje Luke otišlo 90 posto prijeratnog stanovništva. „Bošnjaci su iz međunarodnih fondova obnovili kuće u RS, 98 posto pravno-imovinskih pitanja je riješeno, a onda su prodali te kuće i otišli u Tuzlu“, naveo je predsjednik RS-a.

"Ne trijumfujte na patnji Bošnjaka. Pomozite im. Razgovarajte... ako ne možete naći sagovornika, dajte da ih tražimo“, kazao je Jovanović i upitao Dodika: „Zašto pristajete da budete ono što je Karadžić bio Miloševiću?“.

Dodik je istakao da su u ratu na prostoru BiH učestvovala tri naroda, Srbi, Hrvati i Muslimani, da su ginuli sa sve tri strane i da za to treba da odgovaraju pojedinci koji su u zločinima učestvovali. "U ratu su ginuli predstavnici sva tri naroda, ali su svi i činili zločine", konstatovao je Dodik, rekavši da RS može razgovarati sa Bošnjacima i da razumije da su Bošnjaci „najviše nastradali“, ali da nije tačno da je bilo 300.000 žrtava. Prema njegovim riječima u ratu je stradalo „94.000 ljudi, od čega je bilo 30.000 Srba“.

Govoreći o odnosima sa Srbijom, Dodik je rekao da Beograd ima korektan odnos prema RS, ali da ima i odgovornost jer je potpisao Dejton. "U tom pogledu mislim da se nedovoljno angažuje na sprovođenju Daytonskog sporazuma. Dok postoji Dayton, postoji i obaveza Srbije da ga brani", rekao je Dodik ističući da smatra da je dosadašnje zalaganje Beograda minimalno i nedovoljno.

Jovanović mu je poručio da se politikom "stiglo do rata sa Angelinom Jolie", aludirajući na široku raspravu u javnosti o odnosu prema ratu i ulozi Srba u filmu popularne glumice.

„Nekada su Skender Kulenović i drugi pjesnici pisali lepe pesme o Srbima. Ko to danas radi? Vi ste osudili Srbe svojom politikom“, rekao je Jovanović. „Posao nema 42 posto ljudi, narod je nesrećan i osuđen na političku bahatost i teatralnost. Pre 20 godina bilo je manje otrova između tri naroda, zemlja je zatrovana nacionalizmom“, izjavio je on.

## **O sjeveru Kosova**

„Srbi su mnogo puta poniženi u istoriji. Ne možete da im oduzmete sve, a da ih za sve optužujete“, naveo je Dodik te dodao da je u političkom smislu „RS jedino što je ostalo Srbima“. Dodik je naveo da ni Vojislav Koštunica ni Boris Tadić nikada nisu tražili nikakvo ponašanje od Republike Srpske.

Jovanović mu je prigovorio da je ranije hvalio Koštunicu, a da sada čini drugačije. „Jednom vam je Koštunica bio impotentni političar, a poslije ste pozivali da se glasa za njega“, poručio je Jovanović.

Govoreći o Kosovu, Dodik izjavio je da BiH nikad neće priznati Kosovo, a da će on otići na sjever Kosova u svojstvu predsjednika RS, ako bude pozvan. "Naravno da ću ići na sjever Kosova", rekao je i dodao da je srpski narod stradalnik u svim prethodnim ratovima te da se zna „kako je srpski narod prošao na Kosovu“.

Jovanović je na to uzvratilo Dodiku da će „ići na Kosovo ako ga Tači pozove“, a ne zato što to želi.

*Izvor: Al Jazeera*